



partii naleraq

UKA 2016/057+143-01

26-10-2016

Naalakkersuisut namminersortunngorsaanermut isumalioqatigiissitamik pilersitsinissaannut, pisortat suliffeqarfiit tamakkiisumik tamakkiisumiinngitsumillu pigisaannik misissueqqissaartussanik siunnersuuteqartussanillu suliffeqarfiit sorliit namminersortunngorsarnerinit iluanaaruteqartoqarsinnaaneramik suliaqartussanik aalajangiiffigisassatut siunnersuut. Misissuineq UKA 2017-mi Inatsisartunut tunniunneqassaaq.

(Inatsisartunut ilaasortaq Poul Hansen, Demokraatit)

Inatsisartut aaliangiiffigisassaattut siunnersuut Naalakkersuisut peqquneqassasut Naammassisaqarsinnaassuseqarnermik (produktivitet) ataatsimiisitaliarsuarmik pilersitsissasut.

(Inatsisartunut ilaasortaq Per Rosing-Petersen, Attaviitsoq)

Inatsisartunut ilaasortat Poul Hansen, Demokraatit aamma inatsisartunut ilaasortap Per Rosing-Petersen, attaviitsup siunnersuutaat ataatsimut oqaluuserisassanngortinneqarsimmata Partii Naleraq sinnerlugu imannak oqaaseqarfigissuagut:

Siullermik inatsisartunut ilaasortap Poul Hansen-ip siunnersuutaa, tassa pisortat suliffeqarfiutaasa namminersortunngorsarneqarnissaat pillugu isumalioqatigiissitamik pilersitsinissamut tunngasoq.

Siunnersuut Partii Naleqqamiit tunngaviatigut soqutiginarparput, tassa minnerunngitsumik suliffeqarfiit Namminersorlutik Oqartussanit pigineqartut ilaasa namminersortunngorsarneqarsinnaanerannut tunngatillugu.

Tassami Partii Naleqqamiit ersarissumik eqqartortarparput suliffeqarfeqarfissuit soorlu assersuutigalugu Royal Greenland-itut ittut aalisartunit maanilu nunaqavissunit ilaannakortumik tamakkiisumilluunniit piginneqataaffigineqalersinnaannginnersut.

Soorunami takorloorsinnaavarput, suliffeqarfiup Namminersorlutik Oqartussanit pigineqartup namminersortunngorsarneqarsinnaanera Namminersorlutik Oqartussanut aamma piginnittuulerumaartussanut, aningaasaqarnikkut, sulisoqarnikkut, minnerunngitsumillu inuiaqatigiinnut qanoq sunniuteqarsinnaanerata tamakkiisumik misissuiffigineqarnissaa pisariaqassasoq.

Taamaattumik Naalakkersuisut tamanna pillugu allannguutissatut siunnersuutaat taperserparput, suliallu aappasaanerqannginnerani Inuussutissarsiornermut ataatsimiititaliami suliarineqarnissaa inassutigalugu.

Taavalu inatsisartunut ilaasortap Per Rosing-Petersen, Attaviitsup siunnersuutaa, tassa Naammassisaqarsinnaassuseqarnermik ataatsimiititaliarsumik pilersitsisoqarnissaanut tunngasoq Partii Naleraq sinnerlugu imannak oqaaseqarfigissuarput:

Partii Naleqqamiit isumaqarpugut inuiaqatigiinni aaqqissuussaanikkut allannguissangaanni siunnersuuteqartup ilaatigut oqarneratuut, nunatta aaqqissuusseqqinnissamik pisariaqartitsineranut naapertuuttumik killiffissioqqaarnissaq pisariaqarpoq.

Tassami assersuutigalugu ukiorparujussuarni eqqartorparput allaffissornikkut akisoorujussuarmik ingerlatsinerput. isumaqarpugut inuiaqatigiit ikittunnguulluta taama akisutigisumik allaffissornikkut ingerlatsinerput nunatsinnut inuinit pisariaqartitsinermullu naleqquttunngorlugu aaqqissuuneqartariaqartoq.

Tassami uggornaraluartumik allaffissorneq eqqarsaatigalugu, ukiorparujussuarni inunnut million-ilikkaanut naleqqussakkamik allaffissornikkut ingerlatsivugut.

Ulluinnarni innuttaasunut atugassarititaasut, soorlu ineqarnermut tunngasut, inissiat aningaasarsiaqarnermut naleqqiullugit inunnup ilaqutariinnullu amerlanerpaanut akisuvallaartut atortinneqarput, taamaammallu tupinnanngitsumik ilaqutariippasuit pissakitsut akunnattumillu aningaasarsiallit malinnaaniapiloorput, ilarpassuilumi inigisaminniit anisitaasarput.

Pissutsit taama ingerlanerat allanngortinneqartariaqarpoq.

Atuartitaanikkut ilinniartitaanikkullu pissutsit aamma kalaallit oqaatsitsinnut kultur-itsinnullu naleqqussarnerusariaqarput, tassami ilumoorinnaanngilaq maani nunatsinni kalaallisuinnaq oqaaseqaruit ilinniakkamik sumilluunniit aallartitsisinnaanngitsut.

Qaffasissumik ilinniartitaaneq oqaatsinillu allanik ilinniartitaanerit tapersersorpavut pisariaqartillugillu, kisianni inuusuttut kalaallisuinnaq oqaaseqartut assassorluni sulinerup iluani ilinniarsinnaaneritut periarfissinneqartariaqarput.

Angallannikkut pissutsit aamma nunatsinni atugassarititaasunut naapertuunnerusunngorlugit aaqqissuuneqartariaqarput, tassami pisortaniit angalatinneqartartut inuillu pissaqarnerusut kisiisa angallannikkut qulakkeerunneqarsinnaanngillat.

Taamaammat inuiaqatigiinni pisut assigiinngitsut nalilersorluarlugillu killiffissiorneqarnissaat pisariaqartoq isumaqarpugut.

Sooruna inuiaqatigiinni imigassamik ikiaroorntumillu atonerluinerput taama qaffasitsigisoq ? sooruna suliffissaaleqisut taama amerlatigisut ? sooruna ilaqutariit inigisaminniit tamaa amerlatigisut anisitaasartut ? sooruna meeqqat angerlarsimaffiup avataanut inissinneqartartut taama amerlatigisut ? sooruna kalaaleqativut kalaallisuinnaq oqaaseqartut ilinniagaqalersinnaaneritut periarfissinneqarsinnaanngitsut ?

Apeqquaterparujussuit nalilersorluarlugit akineqarnissaat pisariaqavippoq.

Taamaammatt siunnersuut tunngaviatigut taperserlugu ataatsimiititaliami susassaqartumi oqaluuserilluarneqarnissaa inassutingaarput.